

SMU akan bantu pelajar bentuk pendidikan bangun diri sendiri



PERLUAS PENGALAMAN DI UNIVERSITI: Presiden SMU Profesor Kong melancarkan beberapa program silang disiplin untuk memenuhi minat kerjaya pelajar dan program pendedahan sejagat untuk memperluaskan pengalaman universiti mereka. — Foto ZAObA0

MAHASISWA lazimnya diminta mengisytiharkan jurusan mereka pada akhir tahun pertama.

Namun bagi Universiti Pengurusan Singapura (SMU), ia sedang mendapatkan pelajarinya mengisytiharkan misi kehidupan mereka.

Pendekatan tersebut diumumkan semalam oleh Profesor Lily Kong, presiden baru SMU, lapor *The Straits Times*.

Beliau berkata universiti tersebut sedang meneroka idea mendapatkan sebilangan kecil pelajar yang komited untuk menentukan misi mereka pada akhir tahun pertama pengajian.

Ahli geografi bandar, sosial dan budaya terkenal itu, yang mengambil alih kepimpinan SMU daripada Profesor Arnaud De Meyer bulan lalu, menjelaskan bahawa pelajar mungkin ada keinginan membangunkan amalan perniagaan dan

ekonomi yang mampan atau memperolehi minat mendalam dalam menangani isu persamaan sosial.

Pelajar akan dibimbing oleh mentor-mentor fakulti untuk membentuk resume, atau keterangan diri sendiri, melalui campuran kursus, penyelidikan dan latihan belajar sambil bekerja (internship) yang membolehkan mereka memenuhi misi mereka.

Beliau berkata universiti itu telah melancarkan beberapa program silang disiplin untuk memenuhi minat kerjaya pelajar dan akan meneruskan momentum ini.

Program itu termasuk undang-undang dan ekonomi serta pengurusan bandar bijak dan teknologi.

Profesor Kong juga menekankan satu lagi inisiatif yang telah dimulakan di SMU bagi memastikan semua pelajarinya

menjelajah ke luar negara.

Beliau memaklumkan bahawa pelajar SMU boleh mengharapkan lebih banyak peluang pendedahan sejagat dengan adanya penubuhan Pusat Sejagat (Global Centres) di seluruh dunia.

Antaranya, di bandar seperti Bangkok, Manila, Ho Chi Minh dan Jakarta di rantau Asean.

Daripada 1,775 pelajar SMU yang lulus pada 2017, sebanyak 87 peratus mempunyai sekurang-kurangnya satu bentuk kegiatan pendedahan sejagat semasa mereka di universiti.

Sebanyak 55 peratus daripada golongan itu pula telah menyertai dua kegiatan.

Beliau berkata pusat sejagat itu akan menjadi "jejak SMU di bandar-bandar ini" yang membantu mencari peluang serta menyelaraskan dan membentuk

bersama kegiatan universiti itu.

Ini termasuk menyelaras latihan belajar sambil bekerja pelajar, projek inovasi dan khidmat masyarakat.

"Secara bersama, Pusat Global ini berpotensi menyumbang kepada kewujudan kami di tahap antarabangsa dan membentuk satu rangkaian pusat yang dapat meningkatkan profil SMU, kerjasama dan membangun hubungan dengan masyarakat sejagat," kata Profesor Kong.

Semalam, beliau turut mengumumkan secara rasmi pelantikan provos dan dekan yang baru bagi Sekolah Sains Sosial SMU (SOSS).

Provos SOSS, Profesor Timothy Clark, akan memulakan tugas pada 1 April ini manakala dekan SOSS, Profesor Chandran Kukathas, akan menyertai universiti itu mulai 1 Julai.